

## **Publicaziuns officialas dils 30 d'uoost 2024**

### **Vischnaunca Trun**

#### **Damonda da baghegiar**

**Datum da publicaziun: 30-08-2024**

Petent: Martin Alig, Via Vricla 14, 7167 Zignau  
Object: Montascha d'in silo ault sin parcella 1093 a Zignau  
Zona: Zona d'agricultura (A)

#### **Protestas:**

Ils plans ein deponi en canzlia communal. L'investa publica cuoza 20 dis dapi il datum da publicaziun. Protestas ein d'inoltrar en scret enteifer 20 dis dapi la publicaziun alla suprastanza communal Trun.

*Administraziun communal Trun*

#### **Rapport dalla sessiun dil cussegl da vischnaunca dils 26-08-2024**

##### **Tractanda 1 Approbaziun dil protocol dalla sessiun dils 6-5-2024**

Il protocol dalla sessiun dils 6 da matg 2024 vegn approbaus cun engraziament.

##### **Tractanda 2 Damonda per in credit da frs. 55'000.- per in vehichel pil selvicultur da revier**

Tochen oz fageva il selvicultur da revier diever da siu auto privat e vegneva indemnissaus cun ina tariffa per kilometer. Quella sligiaziun ei buca pli cunvegnenta. Il niev selvicultur ha buca la pusseivladad da far diever da siu auto privat. Sco en tut las autras vischnauncas dil contuorn vul la suprastanza communal metter a disposiziun al selvicultur in vehichel.

Entrar en tractanda vegn decidu cun 12:2 vuschs.

Per saver garantir al selvicultur bien e segir access enteifer igl entir revier forestal intenziunescha la suprastanza communal perquei da cumprar in vehichel adattau per vias d'uaul e da fons. Per quei intent vegn suttamess al cussegl da vischnaunca la damonda per in credit da frs. 55'000.-.

**Cun 12:2 vuschs conceda il cussegl da vischnaunca in credit da frs. 55'000.- per la cumpra d'in vehichel per il selvicultur da revier.**

##### **Tractanda 3 Lescha per il manteniment ed il diever dall'ovra da meglieraziun e dallas vias d'uaul**

Quei che pertucca il manteniment ed il diever dallas vias d'uaul ed il manteniment dallas ovras da meglieraziun valan oz en nosa vischnaunca suandontas legislaziuns:

- Reglament per far diever dallas vias d'uaul cun vehichels da motor per la vischnaunca da Trun (en vigur dapi 2000)

– Reglament per far diever dallas vias d’uaul cun vehichels a motor per la vischnaunca da Schlans (en vigur dapi 2002)

– Reglament pil manteniment dall’ovra da meglieraziun Schlans (en vigur dapi 2010)

En discuors cun igl uffeci d’uaul e prighels da natira eis ei vegniu cussegliu d’unir quels reglaments en ina lescha e gest procurar che la nova lescha corrispundi alla lescha surordinada. Il sboz dalla lescha pil manteniment ed il diever dall’ovra da meglieraziun e dallas vias d’uaul permauns dil cussegl da vischnaunca sebase sin ils reglaments existents. Cumparegliau cun ils tals vegnan ella nova lescha divers puncts sco p. ex. responsablads, manteniment e diever precisai. Quei dat dad ina vart segirtad legala denter ils utilisaders dallas vias e la vischnaunca e da l’altra vart garantescha la vischnaunca aschia che la lescha corresponda allas leschas surordinadas.

**Il cussegl da vischnaunca decida cun 11:3 vuschs da buca entrar en tractanda.**

**Tractanda 4 Damonda per in credit da frs. 200’000.- per la construcziun d’ina piazza da semover sin plaz scola (realisaziun dalla iniziativa dil pievel per in plaz da pausa adattau als basegns dils affons)**

Sco gia informau ha la suprastanza communal retschert il davos da mars 2023 ina iniziativa per in plaz da pausa adattau als basegns dils affons da scola.

La suprastanza communal ha dau suatientscha al giavisch dils iniziants e ha decidu en concordanza cun las empremas tschun iniziantas d’elaborar in project ensemen cun igl uffeci da sanadad dil cantun Grischun. Igl ei vegniu fundau ina gruppa da lavur che secumpona d’ina representanta dils iniziants, commembers dalla suprastanza communal, commembers dil cussegl da scola, il menader da scola, il pedel ed ina representanta digl uffeci da sanadad. Ils 3 da fenadur 2024 ha il biro incaricau presentau diversas variantas. La gruppa da lavur, ils iniziants e la suprastanza communal han tscharniu ensemen la varianta favorisada. La suprastanza damonda d’entrar en tractanda per ch’ins sappi discussiunar davart ils detagls.

Il cussegl da vischnaunca decida unanimamein d’entrar en tractanda.

Duront la presentaziun dil project crodan plirs votums encunter las plontas ed il crest enamiez il plaz. Ins vul vinavon saver nezegiar il plaz da scola per occurrenzas pli grondas.

**La proposta ord il cussegl, da conceder il credit da frs. 200’000.– cun la resalva ch’ils indrezs ein allontanabels e cun la resalva ch’ei detti negin crest e neginas plontas sin il plaz vegn approbada cun 10 encunter 4 vuschs ed 1 abstenziun cun resalva dil referendum facultativ.**

**Tractanda 5 Pusseivladad da tschentar damondas**

Dalla pusseivladad da tschentar damondas vegn fatg diever.

***Per il cussegl da vischnaunca***

*Il president: Bruno Pfister*

***Per la suprastanza communal***

*Il president: Dumeni Tomaschett*

### **Sanaziun dalla via Carmanera**

Las lavurs da cuvrida entscheivan gliendisdis, ils 2 da settember 2024. Il tschancun via naven dalla casa da Flurin e Sandra Decurtins tochen tier il rempar resta serraus tochen ils 13 da settember 2024. In sviament vegn signalisau. Per damondas stat il cau dil menaschi tecnic, Albert Spescha (081 920 20 45), a disposiziun.

*Suprastonza communal Trun*

### **Referendum facultativ**

Il cussegl da vischnaunca ha concediu en sia sessiun dils 26 d'ust 2024 la summa da frs. 200'000.– per la construcziun d'ina piazza da semover sin plaz scola (realisaziun dalla iniziativa dil pievel per in plaz da scola adattau als basegns dils affons).

Conform art. 19 alinea b da nossa constituziun communal vegn quei conclus suttamess al referendum facultativ. In diember da silmeins 40 votantas ni votants san pretender tras il referendum facultativ che quella fatschenta vegni suttamessa alla radunonza da vischnaunca. Tenor art. 20 ei il referendum facultativ d'inoltrar enteifer 20 dis dapi la publicaziun ufficiala, pia entochen ils 20 da settember 2024.

*Suprastonza communal Trun*

*Il president: Dumeni Tomaschett*

*La actuara: Sandra Gautschi*

### **Digital-Café a Mustér**

Ei il mund mobil e digital terren niev per Vus? Haveis Vus damondas en connex cun Vies telefonin ni Vies laptop? Allora selegra la Crusch Cotschna Svizra Grischun da sustener Vus tier Vossas damondas digitalas.

El Digital-Café a Mustér stattan giuvenils dil gimnasi dalla Claustra da Mustér gievgia, ils 05-09-2024 dallas 16.30 – 18.30 el Hotel la Furca, a Vossa disposiziun. La participaziun ei gratuita ed ei drova negina annunzia.

Ulteriuras informaziuns anfleis Vus sut [www.srk-gr.ch](http://www.srk-gr.ch) ni contactei nus sut 081 258 45 84.

Crusch cotschna Svizra

### **Gruppa da seniorAs Trun**

La gruppa da seniorAs Trun envida ils pensiunai/las pensiunadas dalla vischnaunca Trun, **mesjamna, ils 11 da settember 2024** allas 14.00 ella uustria Ogn campadi. En cass che l'aura lubescha havein previu da far ina spasegiada spel Rein e la senda d'art. Annunzias entochen venderdis, ils 6-9-2024, Brigitta Monn, 079 370 22 68; Maria Rensch 079 564 96 39  
Cordialmein envida

*gruppa da pensiunai dall'uniun da dunnas Trun*

### **Museum Cuort Ligia Grischa Trun**

**Dumengia, igl 1. da settember** allas 16.15 en Sala da cultura, scola Trun. Presentaziun dil film «Il Tödi – 200 onns premascensiun» da Bertilla Giossi e discuors cun David Berther, Flurin Maissen ed Aluis Tambornino. Moderaziun Gieri Venzin